

Rapport da gestiun 2017

Charas commembras, chars commembers, charas faaturas, chars fauturs
charas amias e chars amis da La Fliana

60 ons sun passats, daspö la fundaziun da la scoula da paur a Lavin. No vain adattà permanentamaing la sporta als bsögns da nossa populaziun. Cumanzà ha il fundatur rav. Rico Parli, l'on 1957/58 cun ün cuors per paur, al qual han tut part 12 interessents. Il prüm cuors per duonnas ha gnü lö l'on 1960/61, cun 45 participantas. Per la prüma jada vain publichà quist on ils cuors paurils insembel culs cuors generals. L'esit es stat fich positiv. Pro'ls cuors generals vain pudü registrar ca. 20% daplü annunzchas sco l'on avant.

Ils affars ordinaris ha la suprastanza reglà in duos sezzüdas. Nos böt es da sgürar il success dal Lö d'inscunter Chasa Fliana Lavin (in seguit La Fliana) a lunga vista, saja quai cun adattar nossa sporta als bsögns actuals, ma eir cun profitar da la grond'experienza da las manadras e dals manaders dals cuors. No ans vain occupats eir cun la staziun dal tren a Lavin. Cuntschaintamaing deira l'idea da spostar tala dadour cumün. Grazcha a l'iniziativa da bleras persunas interessadas, esa reuschi dad evitar quai. Eir nus ans vain partecipats vi da tal process, cun la ferma presvasiun, cha quai es a favur da La Fliana. Da la sporta dal cumün da Zernez, d'archivar las actas da societats aint il archiv cumünal, vain fat gugent adöver. La suprastanza es landervia da ramassar e registrar las actas per pudair impalmar talas al archivar cumünal. La collavuraziun cun Mia Engiadina as ha verificada. Lur vasts contacts ans güdan a dar cuntschaint nossas sportas. Cun la fundaziun Ferienlager Teufen, vain pudü renovar la cunvegna da dret precedaint da fittar la chasa Fliana. Els sustegnan eir inavant nossa società finansialmaing. Ulteriuras infuormaziuns che chi capita in nossa società as chatta eir sün la pagina d'internet.

Dals 24 october fin als 12 december 2017 ans vain reunits, sco üsità, mincha mardi a las 09:15 h in la sala polivalenta a Lavin. Meditaziun, referat cun discussiun, schoppa da giuotta cun desert e caffè in chasa Fliana e davomezdi lavurs in gruppas, scumaparti in differents locals in cumün, quai es stat il program dal di. Manà tras vain ils seguaints cuors generals: Lavurs da man da tuot gener cun Mengia Bonifazi, Lavin, pitturar cun culuors d'aquarell cun Cilgia Nogler, Bever, calligrafia, differentas scritüras ed ornamentals cun Christa Pinggera, Zernez, giovar teater cun Ottilia Cavelti, Ftan, fieutrar bes-chas e fluors cun Gaby Famos, Vnà, gimnastica per as tgnair corporalmaing e mentalmaing fits cun Anny Unternährer, Scuol, sculpturas in lain cun Peter Jud, Pany, cuors da cuntinuaziun per leptop cun Duri Denoth, Sent, ed atelier da scriver cun Beat Senn, Zizers. Per pauras e paur vain sport duos cuors d'ün di, culs temas omeopatia e valütaziun da muvel da maz.

«Zwischen Orchideen und Kakteen: Leben und Lernen in Mexiko» – referat da la predichanta Marianne Strub, Ardez; «Die Gletscher und ihr Verschwinden», referat da Caroline Fink, Turich; «Da las linguas e da la tuor da Babilonia» referat da Romedi Arquint, Chapella; «La sfida dad ün solitari: Retuorn» – il film da la novella dad Oscar Peer cun moderaziun da Chasper Pult, Paspels / Sent; «Lavur d'üna guardgia dal Parc Naziunal Svizzer, dürant las stagiuns» cun Claudio Irniger, guardian dal parc, Zernez;

“Wie zeigt sich Sehbehinderung im Alter” referat da Ingrid Jansen, Cuaira / Davos; “500 ons refuormaziun” referat da ravarenda Hans-Peter Schreich, Valchava, “La schocca s-charlatta” film in memoria a Tina Cuorad, Lavin, cun moderaziun dad Isabelle Jaeger, e chant d’Advent cun Christa Pinggera. Quai es stat il program da l’avantmezdi. La frequentaziun dals cuors ed eir da las occurenzas es statta fich buna e nus pudain verter inavo sün ün on da grond success. Grazcha fich al comitè d’organisaziun al qual fan part Annapatrizia Richert, Bos-cha, Otilia Christoffel, Silvaplana, Mathilda Pernisch e Annastasia Parli, S-chanf, Annina Erni, Scuol, Gianna Martina Peer, Ramosch e Reto Lamprecht, Sta. Maria.

La situaziun finanziaria da La Fliana as ha stabilisada. Fich allegraivel es l’augmaint dal numer da commembras e commembers da bundant 9 %, sün 214. La buna partecipaziun als cuors e referats sco eir la bainvuglientscha da diversas personas ed instituziuns chi han fat donaziuns generusas, han influenzà considerabelmaing il bun resultat. Las entradas cun dar a fit la chasa Fliana sun dafatta creschüdas per ca. CHF 2'000.-, quai impustüt causa l’instancabel ingaschamaint da nossa administradura Anna Margaritta Filli-Barbüda, Lavin. Grazcha fichun.

Charas commembras, chars commembers, quist on ans stan avant las reelecziuns o elecziuns dals organs da La Fliana. Eu speresch fich, cha nus chattain personas chi sun prontas da surtour respunsabilità per manar nossa società, la quala ha üna grond’importanza per nossa regiun.

Nos ingrazchamaint va a tuottas personas, chi han eir quist on contribui vi da la prosperità da nossa società. Quai sun las commembras e commembers e donaturas e donaturs pel sustegn finanziel, tuottas predichantas e tuots predichants per las meditaziuns, a Christa Pinggera, Zernez, per l’accompagnamaint musical, a Cilgia Etter, San Niclà, chi pissera per la buna schoppa, ad Anna Bonifazi, Lavin, per la lavur sco pedella da la chasa da scoula, ad hommens e duonnas chi güdan pro’l giantar ed a rumir la sala polivalenta, a las numerusas personas chi tachan oura ils placats da nossas occurenzas in ils singuls cumüns, a las medias da massa per las publicaziuns sur da las activitats da nossa società sco eir a tuottas otras personas, chi sustegnan in qualsia möd La Fliana.

Grazcha fichun eir als organs da nossa società, nempe al cussagl, a la suprastanza ed als revisurs da quint per la buna collavuraziun.

Scuol, marz 2018

Il president: *Jachen Erni*